

յաղթած էր, Մըհեն մի առանձին փաղաքական եղանակով ասում էր նրան. «հանգստացի՛ր, գառնուկս, ես քեզ երկար այստեղ չեմ թողնի»: Եւ իրաւ, մի քանի րոպէից յետոյ յայտնուում էր Մըհեն, իր հետ դուրս քաշելով գազանին, որի գլուխը եւ բերանը կաշկանդուած էին լինում քալափչէի մէջ, եւ այնքան ամուր կերպով, որ ոչ ոքին վնասել չէր կարող:

Խիստ սակաւ անգամ էր պատահում, որ Մըհեն դուրս գար վիրապից երեսը արհւնաթաթախ, ծվատուած կամ մարմնի մի այլ մասը վիրաւորուած: Բայց երբէք չէր պատահում, որ նա չկարողանար զսպել գազանին: Ես մինչեւ այսօր յիշում եմ, թէ որպիսի՛ անհոգութեամբ այդ երկաթէ մարդը ձեռքով սրբում էր իր երեսից արհւնը, կարծես թէ քրտինք էր սրբում:

Աւօյի պարապմունքի մէջ Մըհեն օգնում էր նրան աւելի, քան նրա բոլոր որսորդական շները եւ բարակները: Նա զարմանալի ճարակութիւններ եւ հասկացողութիւն ունէր որսորդութեան մէջ: Անասունների բնաւորութիւնը եւ նրանց սովորութիւնները նա այն աստիճան ուսումնասիրած էր, որ բաւական էր տեսնել նրանց թաթերի ձիւնի վրայ տպաւորուած հետքերը, այնուհետեւ նա գիտէր, թէ ի՛նչ անասուն էր անցել, որտե՛ղ կարելի է գտնել նրան կամ ի՛նչ հնարքով պետք էր որսալ:

Աւօն ուրիշ պարապմունք չունէր. նա ապրում էր որսորդութիւնով միայն: Մազոտ գազանների մորթերի գործածութիւնը մահմեդականների համար պիղծ համարուելով, թուրքերը, պարսիկները եւ քրդերը նրանց որսորդութիւնով չէին պարապում, եւ այս պատճառով ասպարէզը մնացել էր միայն Աւօյին: Նրա տունը մի կատարեալ գազանանոց էր: Ամէն անգամ, ես այնտեղ գնալիս, գտնում էի նրան զբաղուած կամ գազանները կերակրելով եւ կամ աղոեսի, կուզի, գայլի, արջի, վագրի եւ այլ այս տեսակ անասունների մորթերը չորացնելով: Հրեայ եւ հայ վաճառականները իրանք գալիս էին, եւ գնելով մորթերը, տանում էին հեռու երկրներ վաճառելու:

Մարօն այն աստիճան ընտելացած էր գազանների հետ, որ ամենեւին նրանցից չէր վախենում: Մի անգամ նա ցոյց տուեց ինձ մի ամեհի վագր, ասելով.

– Տես, Ֆարհատ, ի՛նչ գեղեցիկ բծեր ունի:

Ես սարսափեցայ, երբ փոքրիկ աղջիկը մօտեցաւ եւ սկսեց փայփայել գազանի ահագին գլուխը:

– Ինչո՞ւ ես վախենում, – ասաց նա ծիծաղելով, – դա մի մեծ կատու է, եւ աւելի ոչինչ: